

DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ,

Orthodoxorum Medicorum Patrono.

BIU Santé
Médecine
Paris

QUÆSTIO MEDICA*

QUOD LIBETARIIS DISPUTATIONIBUS

manè discutienda in Scholis Medicorum, die Jovis decimâ-quintâ
mensis Februarii, anno Domini M. DCC. LXXXVII.

M. PHILIBERTO BORIE, Doctore Medico, Præside.

Utrum in triplici Corporis Cavitate, diversus Sanguinis motus?

I.

OMNIUM Corporis humani partium elegans symmetria, ingeniosa dispositio, sublime artificium. Hic fluidæ suis coërcentur canalibus; illic ossæ opportunè flexibilem toti Machinæ conciliant rigiditatem; aliæ motrici pollentes *energîâ*, inertem alioquî agitant molem; aliæ firmiores, mollioribus præsidio sunt; quædam sensationum organa, externis agentibus obviæ patent undiquè; quædam, in interioribus reconditæ latebris, exterioribus proteguntur. Internarum, externarumque partium mutuum est commercium, cospiratio mutua. Hæ materiem elaborandam, futuram vitæ fomitem, undiquè conquistam, sollicitè suppeditant; illæ succos digerunt & laudabiles distribuunt vitæ rivulos. Utræque sibi famulantur invicem. Nonnullæ tamen numerantur partes, quas meritò principes appellaveris, utpote quarum functiones & usus vitam constituent, sanitatiquè conferant amplius. In eo resplendescit Naturæ sedulitas, quòd istas, plùs minùsve validis munitas propugnaculis, in tuto posuerit, ac veluti circumvallaverit. Tria sunt in corpore partium istiusmodi nobilium repagula. Cranium, ingeniosâ constructum architecturâ, muniendâ molliori cerebri substantiæ comparatum est. Thorax, ossæis, cartilagineisque compositum arcubus; vitæ destinata recipit organa. Abdomen, carneis, mobilibus & elasticis constans parietibus, multiplicis generis viscera complectitur. Tres illæ cavitates totidem sunt officinæ, in quibus, circulantis beneficio sanguinis, cuduntur fugientis & in dies labantis vitæ retinacula.

I. I.

FLUIDIS, in corpore sano, tam proprium est circulari motu progredi, quàm necessarium. Fluiditatis inimica & corruptionis parens est stagnatio. Hinc circulationem nullibi non reperiatis. In ore saliva depluit à sanguine secreta, rursus

* Propug. anno 1732, à Gaspard COCHON DU PUY; M. Hyac.-Theod. BARON, Præside.

sanguini remiscenda; dum alimentis molliem humiditatemque suppeditat. Chylo diluendo, requiritur uberior lymphatici copia laticis; hinc ubique separatur à sanguine lymphaticus humor, chylo progredienti permiscendus. Resinosæ acresque particulæ, si sanguinem inficerent, omne perverterent nutritionis opus; hinc in hepate deponuntur, intrâ sanguinis alveum revehendæ, cum alimentorum cœctioni perfectionem attulerint. In testibus percolatur, præcipuus generationis opifex, semen, quodd in sanguinem refluxum, aliis partibus robur impertit ac vigorem. Major in sanguine salium proventus, optabilem corrumpet ipsius dulcedinem; hinc renibus sero diluti dimittuntur, dum per gulam intereâ nova semper accedit ab alimentis falsædinis materies. In cerebro nobilis & vivificus à sanguine præparatur humor, spiritus animalis, qui suo functus officio in sanguinem refunditur denuò secernendus. Ex arteriarum extremis stillat & in adiposâ membranâ deponitur pinguedo, quam resorbent venarum capillamenta. Aëris ipsius nonne datur in corpore circuitus, dum alimentis, excrementisque permixtus aër continuò ingeritur æque ac egeritur? Omnia circumeunt in corpore, jugique abripiuntur motu; nihil in eo permanens, nihil perenne, nisi ipsa circulatio, quæ pro triplici cavitatum differentiâ, juxta diversas leges, per diversimode configurata vasa, diversis concurrentibus causis exequitur, diversaque exhibet phænomena.

III.

IS est sanguini indictus à Naturâ generalior circulandi modus, ut ventriculi cordis sinistri contractione vehementer impulsus, per arterias, aortæ ramos, in varias corporis partes distribuatur, singulis motum, calorem, vitamque largiturus. Hunc suo defunctum munere, in cor transmittendum excipiunt venarum capillamenta, quæ sensim crescunt eundo, majoresque constituunt venarum ramos, arterias numero & diametri latitudine superantes. Tali constructis artificio vasis, vehitur revehiturque cruor, cordis & arteriarum diastole ac systole alterno motu oscillantibus. Jam si singulas scruteris corporis cavitates, aliquid discriminis ubique reperies. Num juvat pectoris latebras introspicere? En à generali circulatione longè dissimilis, nova sese profert circulatio cruori subeunda, priusquam ex omnibus redux partibus, sinistro cordis ventriculo denuò committatur: transitum intellige sanguinis per pneumaticam pulmonum machinam. Non hic sinister cordis ventriculus, sed qui à dextris situs est alter, moventis organi munus adimplet. Non hic sufficiunt cordis robur, arteriarumque systole; nova, huic perficiendæ circulationi, accedat causa necessum est: aëris nempe pressio & elaterium, quæ, nisi implendo, complicata explicarent vasa, progredientique fluido calcar adderent, præceps instaret suffocationis periculum. Non hic numerosiores latioresque venæ vectum per arterias revehunt liquorem; sed illum, aëris frigore condensatum, excipit strictior quàm in arteriis venarum pulmonalium alveus. Plura quæris in pectore? Cor ipsum proprias & peculiare agnoscit in sanguine circulandi modos. Coronariæ ipsius arteriæ, ex aortæ basi oriundæ, à solitâ omnium corporis arteriarum deflecentes lege, cordis motui famulantur, communesque ac *synchronas* cum eo exercent oscillationes. Nec in venas tantum, sed & in ipsummet sinistram cordis finem sanguinem exprimunt arteriæ coronariæ; hic nova exurgit, nec alibi observanda, sanguinis circulatio, quæ intra ventriculi cordis sinistri & aortæ trunci limitibus comprehenditur; dum nempe exigua sanguinis portio expellitur ex aortæ trunco in arterias coronarias, quæ accepti sanguinis partem, venis & pulmonibus insalutatis, ventriculo sinistro restituant, in aortam, rursusque in coronarias arterias refundendam.

IN abdominis cavo quot delitescunt viscera, tot deprehenduntur circulationum modi. Sanguis per arterias mesentericas & coeliacam progrediens plerisque ventris infimi distribuitur visceribus, ibique diversimodè circulando, diversis fungitur officiis. Hic liquorem gastricum, illic lympham exuit intestinale; hic succum pancreaticum deponit, illic pinguedinem; teritur in liene, in omnibus demum salis volatilis, resinotarumque partium evolutionem recipit. Cruori, tot variis agitato motibus, nova manet adhuc suscipienda circulandi ratio, abdominis cavitati propria. Sanguinem per memoratas vestrum arterias quæ revehunt venæ, in ampliorem venæ portæ sinum concurrentes, rursus dividuntur in capillamenta arteriarum æmulæ. Sic venosus sanguis, arteriosi vices adimplens, secretioni materiem suppeditat, jamque emensas semel capillarium relegens angustias, bilem, quæ turget, exuit in hepate. Tandem venæ cavæ capillamentis exceptus, in dextrum cordis ventriculum refunditur, duplicem expertus in abdomine circulationem. Peculiarem hunc sanguinis motum peculiaris causa juvat: scilicet, diaphragmatis & musculorum abdominis alternans oscillatio, quæ contenta molliter versando viscera, remotam à venæ portæ ramis cordis potentiam supplet, supplet & absentem arteriarum systolem. Quid plura? Quæ in abdominis cavo latitat uteri cavitas, nonne diversæ circulationis exhibet specimina? Hic singulo mense mactatur quasi victima, & ex ipso sanguinis fluxu viget partis incolumitas. Num gravida gestat utero mulier? Nova prodit in sanguine circulationis species. Omnia sine periculo dilatantur enormiter uteri vasa, appellit uberius purpureus latex, homuncionis pabulum depositurus. Fœtum inter & placenta per umbilicalia vasa novæ circulationis nectitur commercium. Fœtus quoque proprium in se continet cruoris circuitum, dum venâ cavâ advectus sanguis, pulmonem, aëris defectu flaxidum, omittendo, per foramen ovale, arteriosumque canalem, in aortam detorquetur statim, quandiu fœtus abdominis materni comprehenditur carceribus.

V.

SUPREMUM corporis ventrem nunc rimemur oculis. Qui rectâ viâ ad partes destinatas fluit ubique sanguis arteriosus, hic per tortuosos vasorum flexus progreditur. Vertebrales arteriæ inter foramina, quibus transversæ vertebrarum colli perviæ sunt apophyses, flexuoso ductu vehunt sanguinem ad cerebrum. Carotides internæ, intrâ sinuosum apophyseôs petrosæ ductum & circa sphœnoidis sellam, reptant serpentino gressu: ut sic per varios angulorum obices, crassioribus moræ nectantur partibus, dum prætergreditur tenuior pars, spirituum secretioni suffectura materiem. Nec minus à solitâ ratione recedit sanguinis reditus à cerebro. Arteriarum comites venæ, non (ut fieri solet) ad cordis usque cavum producuntur; sed contentum sanguinem deponere impatientes, breviori ductu, eum intrâ peculiaris naturæ canales, duræ menynge sinus, exonerant, horum ope in venas jugulares vertebralesque transmittendum. Quis jam, ex hoc tam dissimili vasorum apparatu, diversum in sanguine non agnoscit motum? Sed quantò patet evidentius illud circulationum discrimen, si diversæ capillarium distributiones sagacioribus lustrantur oculis, si intima viscerum penetralia solerti injectionum arte referantur? Omnes circulationum vias nondum affecutus est qui circa crassiores vasorum ramos immoratur tantùm. In abscondita Naturæ miracula longè penetrant alius perpicax microscopiorum acies, mentiensque sangui-

nem subtilior cera. Quæ in crassioribus vasis adeò variat Natura, dum diversa meditatur opera quanto magis à se ipsâ dissimilis est, dum in ipsis capillaribus operatur. Ut jucundum est spectaculum, intra diversas corporis cavitates diversa contemplari vascula, mille complicata modis, mille angulis sese invicem decussantia, modò in globulos contorta, modò expansa in arbores, modò in reticulos conformata. Hæc omnia sanè sanguinis diversimode circulantis argumenta.

Ergo in triplici Corporis Cavitate, diversus Sanguinis motus.

DOMINI DOCTORES DISPUTATURI.

M. Ant-Chaumont **SABATIER**,
Regis in Portu Breſtensi Me-
dicus.

M. Car.-Jacobus **SAILLANT**.

M. Natalis-Nicol. **MALLET**,
Conſiliarius Medicus Regis
in ſupremâ Monetarum Cu-
ria.

M. Joannes-Franciscus-Achilles
DE LALQUETTE, Eques.

M. Theobaldus **NIZON**.

M. Franciscus - Ludovicus
THOMAS-DONGÉE.

M. Henricus-Joannes **BAGET**,
rei Herbaria Profeſſor deſi-
gnatus.

M. Jacobus - Franciscus **DE**
VILLIERS, olim Regis Exer-
citiuum Medicus ordinarius in
Germaniâ.

M. Guillelmus **FUMÉE**.

Proponebat Pariſiis **ANTONIUS BOTTMAN**, Warſawæus, Conſiliarius Auſicus
S. M. Regis Poloniæ, Doctör Rhemus, necnon Saluberrimæ
Facultatis Medicinæ Pariſienſis Baccalaureus.

A. R. S. H. 1787. AB OCTAVA AD MERIDIEM.

BIU Santé
Médecine
Paris

Typis **QUILLAU**, Saluberrimæ Facultatis Medicinæ Pariſienſis Typographi.